



14. august 2009

DEMOKRAATIT
DEMOKRATERNE

UKA 2009/17

Inatsisartut Suleriaasianni § 36 imm. 2 tunngavigalugu Naalackersuisunut apeqquteqaatit makkua apeqquteqaatiginarpakka:

Naalackersuisunut apeqqut: Naalackersuisut qanoq isumaqarfigaat EU-mi peqqussutip nr. 1107/2006-ip eqqunneqarnissaa, innarluutillit timmisartorlutik angalasarnerannut tunngassuteqartoq?

(Inatsisartunut ilaasortaq Astrid Fleischer Rex, Demokraatit)

Tunngavilersuut:

Kalaallit Nunaat EU-mi ilaasortaangilagaq, taamaammallu EU-mingaanneersunik peqqussutinik assigiinningsunik inatsisitsinni atuutsitsilernissaminut pisussaataaaffeqarani. Illuatungaatigulli taamaaliussagutta akornutissartaqartinneqanngilagut, EU-mi peqqussutip eqqunissaa iluaqutaasinnaasutut isikkoqassappat.

Demokraatit qularutiginnilluinnarpaat, EU-mi peqqussut nr. 1107/2006¹ innarluutillit timmisartorlutik angalasarnerannut tunngassuteqartoq, peqqussutaasoq pitsaasupilussuaq, uagullu Kalaallit Nunaanni nammineq inatsisitsinnut piaarnerpaamik ilannguttariaqaralaripput.

Naatsumik oqaatigalugu, peqqussutip imarai inatsisit pituttuisut, inuit innarluutillit timmisartorlutik angalanissaminut pisinnaatitaaffiunik naligiisitsilernissamik qularnaarisussat. Peqqussummi pingaarnertut tunngaviusut tassaapput, innarluutilik timmisartorluni angalarusuttoq ilaatikkumannginneqarsinnaassanngitsoq, kiisalu inuit innarluutillit timmisartorlutik angalanerminni pisariaqartitatik naapertorlugit ikiorteqarsinnaamissaat qularnaarneqassasoq.

Ikiorteqartitsinissamut suliassaq timmisartoqarfinniit timmisartortitseqatigiiffinniillu avinneqartussaavoq. Timmisartoqarfiit akisussaaffigissavaat timmisartuni ilaasut timmisartut avataanni sullinneqarnissaat tamaat.

Timmisartoqarfiittaaq tikinnerni aallalernernilu katersuuffiusinnaasut aaliangissavaat. Taakkunani ilaasussat innarluutillit timmisartumut ikinissamik tungaannut pisariaqartitaminnik ikiorneqarnissaminut piniarsinnaassapput. Pingaaruteqarpoq maluginiassallugu, kingusinnerpaamik aallarnissamut nalunaaquttap akunneri 48-ut sioqqullugit pisariaqartitsinermik ilisimatitserersimasoqartassamat. Tamanna billetsissamik inniminniinermi isumagineqarsinnaavoq.

Timmisartortitseqatigiiffiup – tassa Air Greenland-ip – timmisartumi ikiorteqarnissaq akisussaaffigissavaa, sullissinerullu taassuma ingerlanneqarnissaanut pitsaassutsimik qularnaarinissaq suliarissallugu.

Sulisut pikkorissarneqarnissaat timmisartoqarfinni timmisartortitseqatigiiffinnilu suliassatut avinneqassaaq. Pikkorissaaneq akeqarpoq, aningaasartuutillu pikkorissartitsinermut atorneqartut peqqussutip eqqunneqarneranut atatillugu, mittarfimmi aningaasartuutitut ilanngunneqassapput.

Taamatut oqaaseqarlunga Naalackersuisut akissutissaat qilanaaraakka.

¹ Peqqussut tamarmi tuluttut uani atuarneqarsinnaavoq: <http://eur-lex.europa.eu/LexUriServ/LexUriServ.do?uri=OJ:L:2006:204:0001:0009:EN:PDF>